

04. maj 2017

Tasiilami inunnik isumaginninnikkut pissutsit pitsanngorsarneqarnissaat qularnaarumallugu 2018-mut aningaasanut inatsisissamut atatillugu 2018-mi ukiunilu missingersersuusiorfisuni ukiumut 5 millioner koruuninik immikkoortitsisoqartarnissaa pillugu Naalakkersuisut peq-quneqarnissaannik Inatsisartut aalajangiiffigisassaattut siunnersuut. Suliniut ingerlanneqas-saaq Kommuneqarfik Sermersooq qanimut ataqatigiissaareqatigalugu.

(Inatsisartunut ilaasortat Randi Vestergaard Evaldsen aamma Justus Hansen, Demokraatit)

Siullertut Randi Vestergaard Evaldsen aamma Justus Hansen Demokratineersut Siumumiit saqqum-miussaannut soqutigintumut aammalu pingaaruteqarluinnartumut qujaffigivagut.

Naalakkersuisooqatigiit sulissutigissavaat inunnik sullissinermi sulisorisat tamarnik ataavartumik pikkorissartinneqartarnissaat. Taamatuttaaq inunnik sullissinermi ilisimasanik katersuiffik kommunini sullissiniarnermi iluaqutaasussaq Naalakkersuisooqatigiit pilersinniarpaat. Isumagi-neqarnissamik pisariaqartitsisut imminnut ikiorsinnaanngortillugit ikiorserneqartarnissaat sulissuti-gineqassaaq.

Tasiilami pissutsit ilaatigut alianartut nalaattakkallu unammillernartut ukiuni arlaqalersuni nalaan-neqqartarsimapput, tamanna ilumoorpoq. Takusinnaavarput misissuilluarsimansi pimoorullugu ingerlassimagissi, tamanna assut qujamasunnarpoq. Pissutsit assigiinngitsut kingumut qiviarlugit innuttaasut atugaat ila imaannaasarsimannegeqaat.

Siunnersuuteqarnissit takusinnaalluarpagut inuit atugaasa pitsanngorsarneqarnissaat angorusuk-kissi, tamanna inuiannut ilungersortunut iluaqutaasussatut aamma isigaarput.

Taamaakkaluortoq ilaatigut nunarput tamakkerlugu maani qinigaasugut nunatta sineriaa aamma qiviartariaqartarparput. Kommuneqarfiit allat inunnut tunngasunut suliassaqarfii aamma annertuu-mik ajornartorsiuteqarput. Inatsisartuni nuna tamaat sinnerlugu qinigaagatta eqqaamassavarput. Taamaattumik Siumumiit pingaartilluinnarpagut Kommuneqarfiit allat aamma peqataatillugit nali-lersuiffigineqaannaratik iliuuseqarfigineqarnissaat.

Inuit avinngarusimalluinnartuni najugallit inooriaasiat, oqaasii pingaartitaallu allanit allaanerus-suteqarneri nalunngilagut, isumaqarpugullu pingaaruteqassasoq innuttaasut pisariaqartitaat ani-ngaasatigut kisiat pinnani qaammarsaanerli annertunerusoq siammartinniarlugu inuiaat akuutillugit inerisarneqartariaqartut.

Susassareqatigiinneq oqaluttuaannanngussanngippat inuit piumassusillit sulerusuttut allanullu akuutitserusuttut peqatigalugit inerisaasoqartariaqarpoq, uani aamma Kommune susassaqarfinni annertuuni attuumassuteqarpoq.

Taamaattumik isumaqarpugut aningaasat akilersinnaanngisaat tassaasoq perorsaaneq maligassiui-lluarnelut. Taakkuupput inuiaqatigiinni pingaarnertut nukittorsagassagut, aatsaat taamaasiornitsigut inuiattut oqaasinngortissinnaanngisagut immaqalu paqumigisagut pikkoriffiartulissagatsigit.

Naggasiutigalugu Siumumiit oqaatigissavarput Naalakkersuisut allannguutissatut siunnersuutaat ilalerlugu siunnersuutip Ataatsimiititaliamut ingerlanneqarnissaa kaammattuutigigatsigu.



Laura Táunâjik
Siumut